

NTIÑ-NNIM IKỌ KE ABAÑA EDISUAÑ ETOP ETI-MBUK

Isaiah 40:1-31; 52:7-10; Matthew 3:1-3; 11:2-15

ỌYỌHỌ UKPEP-ÑKPỌ 352

Eke Mkparawa

IKỌ IBUOT: “Mbufo ekabare esit; koro Ubọñ Heaven ke ekpere” (Matthew 3:2).

Ufọk John

Ke nsat, itiat-itiat ye obot-obot obio Judea, ke ñkañ edem usop-utin emi esañade esim mben esuk Inyañ Mkpa, John, Ọduọk-owo mmọñ ama amana ọnọ ete ye eka emi ekedide mbon nsuhoreidem. Ndsuk ke ufọk esie enye ekeme ndida ñkut Obot Nebo ye Inyañ Jordan, ye mme ñkan-ñkuk Obio Jericho. Mben idim Cherith emi mme utere ekebọkde Elijah ke ini akañ ama onyuñ ekpere do. Ndsuk ini John ama esika ekese ndusuk mme ebiet emi mme Anditiñ ntiñ-ñnim ikọ eke Abasi ekenamde ekabare edi edisana. Ukem-ukem odudu, ye ukeme, ye ifiopesit emi ekecutde ke Elijah, ama onyuñ odu ke esit John. Mme edu-uwem, ye edisine-ñkpọ esie ñko, ama onyuñ ebiet eke Elijah. Mme udia esie ekedi aran ọkwọk-ikọt ye ñkuku-ñkpọyọriyọ (Matthew 3:4), emi ndusuk ekeñwande ke iso utin, emi ekemedede ndidi ke inem esie ekebiet obu.

Etop Esie

John ekedi owo emi ekenyenede mfoniso ndisian mbaña eridi Jesus. Nte ñkpọ utiñ-ikọ emi ọsọñde uyo, uyo esie ama asuana ọdọk mme obot, ndien mme owo ke Jerusalem ye Judea, ye mmọ emi ekeduñde ñkan-ñkuk mben Inyañ Jordan ema ewọñọ udim-udim edi ke obio, man edikop ukwọrọ-ikọ John. Ndidem edem usiaha-utin ediwak ini esima ndidọñ usuñ-utom eka ekediọñ usuñ enyuñ emen ñkpọ ubiọñọ efep, mbem iso mmọ edika. Ke ntre utom John ekedi ndidiọñ usuñ mbeñe eridi Jesus ke ererimbot. “Emenere ọkpọ-usuñ enọ Abasi nnyin ke desert. Kpukpru itihere ebiet eyemenere ke enyoñ, kpukpru ikpọ ye ñkpri obot eyenyuñ esuhore: se ikwañade eyenyuñ akabare enen, ibombom eyenyuñ akabare edi una-isọñ” (Isaiah 40:3, 4). Mme utom esie ikedighe ndibọp mme ikpọ usuñ eke etarade enyuñ eñwañade, ye ndisuan mme obot, edi enye ekedi ndida owo mfiak ke usuñ ñkop item, nnyuñ mkpep mmọ ndisio ntañidem ye mbubik ido ke uwem mmọ mfep; nnyuñ ñkabare esit ñkpọñ mme idiọk-ñkpọ mmọ.

Ukwọrọ-ikọ emi ekenyenede ikọ duop akada ubiom-ikpe ọnọ mme owo emi ekeyarade mme idiọk-ñkpọ mmọ enyuñ enade uduọk-mmọñ ke ubọk John ke Jordan. Nso ikedi akpan etop emi John ọkwọrọde? “Mbufo ekabare esit; koro Ubọñ Heaven ke ekpere” (Matthew 3:2).

Mme Ukpep-Ñkpọ Emi Ekutde Ke Enyin

“Ubọñ Heaven” ọkwọrọ didie? Etiñ ediwak ñkpọ ke Ñwed Abasi ebaña emi, onyuñ edi akpan ñkpọ nnyin ndifiọk. Jesus akada mme uwut-ñkpọ emi ndiñwana ndinam enye añwaña: (1) Mkpasip mustard; (2) Leaven eke emende esin ke ndom-uyo; (3) Owo urua; (4) Iyire eke eduọkde ke inyañ; (5) Eti mkpasip; (6) Inyene eke edibede ke iñwañ (Matthew 13:31-47); (7) Ete ufọk (Matthew 20:1); (8) Edidem kiet emi anamde udia-ndọ ọnọ eyen esie (Matthew 22:2); (9) Nditọ-iban duop emi ekewọñde eka ndisobo ye ọdọ-ndọ (Matthew 25:1). Daniel onyuñ etiñ abaña enye nte akwa itiat kiet (Daniel 2:31-45); ye ndusuk mme andiwet Akani Ediommi ema etiñ ñkpọ etuk ñko.

Emi ekeme nditie nte ñkpọ emi ekpetimere ndusuk mkparawa iren ye iban, edi nnyin iyom nditim ntat enyin nnyin, ye utọñ nnyin, ye mme esit nnyin; man ikpep se emi ọwọrọde. Nnyin iyomke nditie nte mme nnan ke mbuk ñke emi ekeyomde ndifiọk nte enin etiede. Owo nnan kiet otuk nnuk onyuñ ọdọhọ ete, ke emi mmọfiọk nte ke enin etie nte eduat; owo efen otuk ukot, onyuñ ọdọhọ ete ana nte enye etie nte eto, kpa ye oro owo nnan eñwen ọduọ odoro ke idem enin, onyuñ ete ke enin etie nte ibibene. Edi nnyin idighe nnan, nte nnyin ikutde ñkpọ inyuñ idighe enye eke mikaha anyan, emi akpanamde nnyin ikot ubak itie ikpọñ-ikpọñ ke ñwed Abasi, edi nnyin imenyene ofuri ikọ Abasi, do ke nnyin ikeme ndikut ibọrọ mbume: Obio Ubọñ Heaven ọwọrọ nso?

Jesus ediwak ini esida “n̄kpo emi owo ekutde” ke enyin, man Enye anam mme owo efiok se Enye ekpepde. Enye onyuñ etiñ abaña mkpasip mustard, ete ke enye ekpri akan kpukpru mkpasip, edi ke ini okoride okpon akan mbiet, onyuñ akabare edi eto, mme inuen enyoñ enyuñ edi edikubọ ke n̄kọk esie. Jesus ete, ke emi ebiet Obio Ubọñ Heaven.

Mme asaña-isañ emi ema ekesim Edisana Obio, ebuk enọ nnyin ete, ke uduot mustard emi Jesus eketiñde abaña, ke akaka iso okori uwak-uwak ke Palestine, tutu ndusuk ini onioñ osim akamba idaha. Inyuñ idighe okposon n̄kpo owo ndifiok nte ke ini edimende “isuñi” ifep ke iso ison ke ini mme n̄kpri ye ikpo eto edikoride enyuñ eyede uyai kpa ntre eto mustard eyekori onyuñ okoñ tutu osim akamba idaha.

Edidem Ye Obio Ubọñ

Obio Ubọñ ye mme andidu ke idak ukara enyene ndinyene edidem, ye mbon ufok edidem, ye ebekpo, ubon ubon, ye mme ada idaha; ye mme owo, mmọ emi edude ke idak ukara emi ekopde uyo edidem. Ke ini Christ Edidem edifiakde edi ndikara ke ererimbot, Enye eyewuk Ebekpo Ubọñ Esie ke Jerusalem ndien “ubon Jehovah eyeyarare, kpukpru owo otọ kiet eyenyuñ ekut Enye: koro uyo Jehovah odohode” (Isaiah 40:5). Ndisana owo emi ekesañade ye Christ efiak edi, eyekara ye Enye (Eriyarare 2:26, 27; 5:10), nte nnyin ikekpepde ke oyohọ ukpep-n̄kpo 342. Edinem ukara emi Christ edidide Edidem eyesim ofuri ererimbot. Nte emi iditiehe nte eto emi okoride tutu oyohọ ofuri iso ison? Me nte itiat, emi Daniel eketiñde abaña, emi okonyuñ oyohode ke ofuri iso ison?

N̄kori Esie

Ini Emana Eti-Mbuk emi, edi mme usen eke nnyin idude ke esit, emi edi akpa ikpehe Obio Ubọñ Esie. Akpa, ekedi uyo okworọ-ikọ emi akasañade ikpon, edisine-n̄kpo esie ekedide idet akamba enañ-mbiomo (camel) (Matthew 3:4), ekenyuñ ekopde uyo esie ke akpa-utatan. NDIEN JESUS EDI! Ema enyuñ enam ediwak owo eworo ke ufin idiok-n̄kpo, n̄ko ema enyuñ emek mme Apostle duopeba ndikworọ Eti-Mbuk. Mmọ ema eworo eka ndien mbuk emi onyuñ asuana usop-usop oto ke ikọ inua mmọ. Ke mme isua emi ekebede, mme anam-akpanikọ ke otu mme okworọ-ikọ ye mme anam-utom Abasi, ye mme asuan-etop ikọ Abasi, edi mmọ ke ekecut nte esiande mme ukpon emi edude ke ekim ebaña eti-mbuk erinyaña nsio ke idiok-n̄kpo. “Enyene ndibem iso n̄kworo gospel nno kpukpru mme idut” (Mark 13:10), mbemiso Jesus edi, ke enyuñ enanam emi okure ke mme utit usen emi. Mmọ emi ema ekemana obufa ke akpanikọ, enyene udon nditiñ nno mmọ enwen mbaña Jesus; ndien ke mme usen emi, ye mbufa n̄kpo utom, Eti-Mbuk ke asuana usop-usop.

Mme ubom-ison, ye mme nsuñikañ ke akpa, ye mme ubom-ofum ke ikpa-enyoñ, edi mme n̄kpo emi ekekamade esuan etop erinyaña. Okposuk edi nte uyo John ama eketre ke anyan ini ndiyomo ke obot Judea, edi ke ekokop uyo mme okworọ akpanikọ ye edinen ido. Ufok Abasi Apostolic Faith enyene udeme ke ndisuan etop Eti-Mbuk mbe ke mme mboho efak. Mme ufok-n̄kpokobi, ye ufok-ibok ye mme ufok iduñ edi ebiet esikade; idem mmọ emi edude nsan-nsan ke mme isuo esimen Eti-Mbuk ke nsuñikañ esok mmọ; esika ekese mme owo emi ebehede ke nsuñikañ enyuñ eda mmọ edi ke ufok Abasi; esida nditowon n̄ko edi ke Sunday School, ebiet emi esikpepde mmọ ikọ Abasi. Enọ n̄wed Ikọ Abasi ke mfon eka ediwak esen idut ye kpukpru obio ke America. Mme tosin owo ke ebobọ mme n̄wed emi ye mme n̄kpri mbak n̄wed eke emiñde ikọ Abasi esin, n̄ko esibọ uworo-ufin ke idiok-n̄kpo ye erikok ke ikpohidem. Eda ediwak usuñ efen ke nditim nsin ifik nnam mme ewuhọ emi Jesus okonode ete “Eka ke ofuri ererimbot ekekworọ gospel enọ kpukpru owo” (Mark 16:15).

Nti Mbuk

“Ukot owo eti mbuk eye didie ke enyoñ ikpo obot! Ukot owo eke okworode emem, eke obukde eti n̄kpo, eke okworode erinyaña” (Isaiah 52:7). Mmọ emi esuande Gospel edi mme akama eti-mbuk, koro ikọ oro “gospel” woro “eti-mbuk.” Nte afo edi enye emi akamade eti-mbuk? Midighe ntre, nsinam afo mutonoke mfin emi ndito mkpasip eti ido ye ima, ye erinyaña, nnyuñ nse nte ekpri mkpasip edisopde nditibe. Afo emekeme ndiñwam “eto mustard” ndikori n̄ka iso tutu Jesus edita mmọ emi ekedude ke mbeñidem ndisobo ye Enye. “Eyenyuñ ekworọ gospel ubon Abasi emi ke ofuri ekondo nte ntiense enọ kpukpru mme idut, ndien adañoro ke utit eyedi” (Matthew 24:14). Nnyin imenim ite utit emekpere eti-eti.

MME MBUME

1. Ekekop uyo anie ke akai-ikọt ke Judea?
2. Nso ikedi ntak emi ekedoṅde enye? Nso ikedi etop esie?
3. Nso ikedi udia esie? ọfọṅ idem esie?
4. Enye akada mbiet ido anie ke Akani Ediomi?
5. Nọ uwut-ṅkpọ ita emi Jesus ọkonọde, nditiṅ ṅwut nte Obio Ubọṅ Heaven etiede.
6. Ekeyom ekwọrọ etop Eti-Mbuk enọ mme anie?
7. Nnyin ikeme didie ndiṅwam ke ndisuan Eti-Mbuk? Nte afo ke ananam oro?
8. Nso ke Jesus eketiṅ abaṅa John ọduọk-owo mmọṅ?
9. Nnyin inam didie ifiọk ite utit emekpere eti-eti?